

Dörfligeischer 1979

Wüu mir Geischer gäng chlei glücklos singe,
Fasch immer bi de letschte umespringe,
Wärde mir halt wie der FC loufe,
Und üsi Geischer-Aktie verchoufe !

O Furgler Kurt, wie chunnsch du üs vor,
Fasch wie-n-e Schilesack-Diktator,
Wo wett e Busipo benütze,
Für syni Bier-Idee z' schütze !

Der Migros-Boss, dä isch jetz der Dumme,
Die gschänkte Turte chöme ume,
So bruuch doch jetz die Mägefüller
Bym 2M-Bou als Fuegefüller !

Wie chöi die Manneouge weide,
Wenn d' Strandbad-Nixe sich entchleide,
Und ir Summerchelti nöime düre,
Der Zwillingspudding lö lo gfrüüre !

Das Wiehnachtsgschäft wird immer depper,
Jetzt git's dr Loeblech Ichoufs-Schlepper,
Do seit zum Loeb e riiche Bappe,
He Dicke, du was choscht' dä Schlappe !

Ir Nacht sy Schelme se cho hole,
Hei der Justitia ds Wöögli gstohe,
Tüet's nümme häre, s' tuet nid passe,
Viu besser wär e lääri Kasse !

Der Steve verzichtet uf dä Orde,
Wär Biel-Bienne Sportler-König worde,
Latinovich, muesch no chlei warte,
Bis ds Donnschtig-Blatt tuet ds glyche starte !

Der Kanton Jura isch jetz liber,
Doch trotz däm liber hei si Fieber,
Es hätte halt die ruuche Gselle
Der anger Bitz vor Schwyz ou welle !

Der Schah isch ab mit syr Schablone,
Geit a 'ne sich're Platz go wohne,
Wenn d' Perser ihn verdrösche welle,
Göng är i ds Usland ds Gäld go zelle !

Aubert, Aubert, was machsch du da
Zmitts im schwarze Afrika ?
I wott lehre Hula-Hula tanze
Und Uhrelädeli i Urwald pflanze !